

聽秋聲館詞話

昔歲癸巳識鍾仲山於漳州時仲山喜爲詩余喜爲詞
兩人窮日夕爲之以相角越歲仲山別去余旋以一官
自歎奔走南北不能如前專力久之自覺不工輟不復
作逮重遊閩嶠仲山猶時時爲詩余則瞠乎後矣比遭
廢棄思欲重理故業而心機窒塞竟不成句閒居無俚
就見聞記憶所及或因詞及事或因事及詞拉雜書之
藉以消耗歲月惜仲山觀察西蜀相隔萬里不及與之
商榷然爲此無聊筆墨豈夙昔故人所期於余哉積久
成帙禧兒請付手民刊旣竣綴此以誌余愧若謂意有
所岐信口雌黃則余豈敢時

同治八年己巳秋九月丁紹儀識於福州寓廬

三山吳玉田雕

聽秋聲館詞話卷一

無錫丁紹儀杏船

自來詩家或主性靈或矜才學或講格調往往是丹非
素詞則三者缺一不可蓋不曰賦曰吟而曰填則格調
最宜講究否則去上不分平仄任意可以娛俗目不能
欺識者至性靈才學設有所偏非翦綵爲花絕無生氣
卽楊夢滿紙有類瞽詞如楊升庵慎轉應曲云促織促
織聲近銀牀轉急熏殘百合衣香消盡蘭膏夜長長夜
長夜露冷芙蓉花謝非不典麗讀之索然意盡又如陳
在田見鑑前調云百舌百舌飛上花梢啼急一聲聲似

多情。攪得鴛衾夢驚。驚夢。驚夢。鳥也把人調弄。非詞非曲。村不可耐。然升庵另有轉應曲云。銀燭。銀燭。錦帳羅幃。影獨離人無語。銷魂。細雨斜風掩門。門掩。門掩。數盡寒宵更點。便與前詞有清空質實之分。

格調之外。明詞爲甚。國初諸家亦尙不免蓋奉程張二家嘯餘圖譜爲式。踵訛襲陋。如行雲霧中。康熙初宜興萬紅友樹斷斷辨證定爲詞律廓清之功。不小。惜所收

各調錯漏尙多。其所自著亦鮮傑作。殆與考据家罕工古文相似。蘭泉司寇詞綜僅錄其浣溪紗一闕。尙有好事近云。忍淚送君行。江上青山斜矗。別酒一杯還暖。恨

風帆催促。○無情畫舸疾於飛。一水漸拖綠。欲上小樓

凝望。又垂楊遮目。

此詞或傳萬錦雯作

踏莎行云。葉打星窗。雁鳴

颺館。便淒涼煞。無人管。前塵昨夢。不堪提。素顏青鬢。都來換。○寶祿香存。綵箋音斷。細將心事。燈前算。三年有半。爲伊愁。人生能幾。三年半。差有意致。

韓致堯遭唐末造。力不能揮戈。挽日一腔忠憤。無所於洩。不得已託之閨房兒女。世徒以香奩目之。蓋未深究厥旨耳。余最愛其碧闌干外。繡簾垂。猩色屏風。畫折枝。八尺龍鬚方錦褥。已涼天氣。未寒時。一絕與靜中樓閣。深春雨。遠處簾櫳。半夜燈句。言外別具深情。又浣溪紗。

云宿醉離愁慢髻鬟。六銖衣薄惹輕寒。慵紅悶翠掩青
鸞。○羅襪况兼金苗苗。雪肌仍是玉琅玕。骨香腰細更
沈檀。與前詩均自離騷中製。菱荷以爲衣。數語融化而
出。至生查子云。侍女動妝奩。故故驚人睡。誰知本未眠。
背面偷垂淚。○嬾卸鳳凰釵。羞入鴛鴦被。時復見殘燈。
和煙墜金穗。其蒿目時艱。自甘貶死。深鄙楊涉輩之意。
更昭然若揭矣。

崑山徐健庵司寇

乾學

承

詔修一統志。聘吾鄉顧宛溪。

祖禹

太原閻百詩

若璩

常

熟黃子鴻

儀

德清胡東樵

渭

任其事。顧成方輿紀要一

百三十卷於桑經酈註外自成一家胡著禹貢錐指閭
撰述尤夥而詞不概見黃僅存紉蘭詞一卷踏莎行云
宿雨纔收春寒頓減博山銷盡沉煙篆越羅裁得稱身
無黃昏早自停金翦○燭影偏明花陰尙淺曲闌十二
閒憑徧井梧休放月痕來玉堦剛卧金鈴犬水龍吟云
漫睺老態龍鍾少年曾是誇豪興高陽伴侶三春逐日
聯鑣飛鐙山北山南芳菲賞徧別尋幽勝記披襟直上
雲峰絕頂渾欲喚青天應○誰道多生蹭蹬舊情懷都
來難稱十年回首交遊嚼蠟功名墮甌除卻孤吟酒腸
詩膽消磨無贖但秋來猶愛斷鴻聲裏把危樓凭

宜興蔣愼齋太守

永修

題漂母墓臨江仙云漂母橋邊

人去遠淮壖空繞淮流荒原留得小墳幽窮途酬一飯
高義足千秋○世上儘多奇女子而今有此人
不南昌
寄食未央收怪他亭長婦偏欲殺韓侯末二語人所未
道較生死都由兩婦人句尤覺新雋惜全詞粗俗

生查子調五代以後多用四十字體惟陳亞之詞云相
思意已深白紙書難足字字苦參商故要檀郎讀○分
明記得約當歸遠至櫻桃熟何事菊花時猶未回鄉曲
係四十二字或言記得約當歸語氣已足分明二字似
衍不知孫光憲魏承班詞亦間作七字句且記得而言

分明語益沉摯下文接言自春徂秋何事未回思愈切
怨愈深矣孫詞云暖日驟花驄鞦韆垂楊陌芳草惹煙
青落絮隨風白○誰家繡轂動香塵隱映神仙客狂煞
玉鞭郎咫尺音容隔誰家二字似不可少其諷世人見
利爭趨意當於言外得之

宣城施愚山先生

閩章

官巡道後復舉鴻博擢侍講詩

最簡潔五言尤工與山左宋荔裳觀察有南施北宋之
稱詞亦清麗偕友看杏花沁園春云春社纔過花事關
心殊勞夢思正草芽初茁橫鋪翡翠水泉新湧淨漾琉
璃聽說前村杏花開矣曳杖還教載酒隨相將去看日

烘雲暖蝶醉蜂癡。○花間坐卧都宜。悵似錦韶華得幾
時。憶賣來深巷。枝頭猶溼。看從南陌。展齒嫌遲。爲語東
風。好留春住。莫遣飛英著鬢絲。憑報道。早先生歸也。更
唱新詞。頗饒夷猶之致。

華叔延廣文

章慶

吾邑諸生以教習得官。少從吳梅村

曹倦圃諸老遊。詩詞咸有法。菩薩蠻云。新愁似與新秋
約。西風日夕吹蕭索。月色滿闌干。徘徊獨自看。○舊歡
渾似夢。悔把情根種。夢也幾曾圓。百蟲聲裏眠。醉花陰
云。一春常向花前醉。良夜還遲睡。畫閣曉妝慵。雙頰紅
消。簾捲山橫翠。○裁書欲寄憑誰寄。磨滅鴛鴦字。盼斷

北歸鴻。雨滴空階。不抵相思淚。

遼陽佟氏爲從龍望族。世多顯宦。而文采無聞。獨思恩

令

世思

以任子得官。年已四十餘。未幾卒。所著與梅堂

詩文集附詞一卷。雖不克追踪。飲水亦頗有雋語。眼兒
媚云。柳絲撩亂。舞風柔。幽怨在高樓。最難忘。是燈前俏
影。簾下歌喉。○春來底事。懨懨病。長夜冷如秋。一腔心
事。未拋舊恨。又惹新愁。燕歸梁。云檻外。風來花氣幽。閑
倚樓頭。一番離恨。一番愁。春去也。又迎秋。○這般憔悴
如何好。總不若。早歸休。黃昏人靜。月如鉤。剛憶著。去年
遊。含悽欲絕。頗不類。貴公子口吻。

臨川樂蓮裳孝廉

原名宮譜後改名鈞

遊粵時適伊墨卿

秉綬

守

惠州請爲朝雲修墓至潮陽見普甯縣有天潢小裔墓而無名辨爲故明知縣朱統錮女均爲駢體文勒之貞珉詞人好事無如孝廉者後遊揚州眷姑蘇女伶葆珠字以雪如將備小星珠旋卒葬之山塘賦煙夢詞悼之並爲繪像徵詩所著斷水詞阮郎歸云晝長花落小樓陰簾波日影沉闌干曲曲徑深深教人何處尋○經繡戶聽瑤琴關心直到今如今已分不關心愁來爭自禁蝶戀花云時節乍寒還乍暖浪說看花花信無人管牆北牆南蝴蝶滿花開花落青春短○悔飲藍橋漿一盃

一寸柔腸真做千回斷。桃葉桃根波際遠。渡頭不敢高
聲喚。雪如將還吳門有相待。半塘之約送以金縷曲云
且莫傷離別。照同心。江南江北一般明月。此去洗妝梅
花下。判取玉釵寒徹。記那日。酒闌曾說。衣上珍珠千萬
顆。是三生淚點迎風結。因往事。又嗚咽。○遲回心事今
來決。問相逢。綠楊門巷。燕飛時節。十里橫塘東流水。比
似情波千折。更眼底。一天冰雪。多少吹簫紅粉伴。看江
頭。打槳呼桃葉。歌此曲。重淒切。醉花陰。云。慈白衣裳雲
碧袖。蝴蝶雙雙繡。身似玉釵纖。不解相思。卻又因誰瘦。
○海棠一萼紅初透。恰受春風穀。千萬莫輕開。試看枝

頭幾朵紅依舊。隔溪梅令云。半江春水。半江風。落花紅。
幾處。愁人酸淚。寄花中。一時流向東。○淺斟低唱。儘從
容。太匆匆。記得銷魂橋畔。繫青篷。隔窗飛柳絮。雖不盡。
爲雪如作。亦可謂一往情深矣。

但起東山謝安石。爲君談笑。淨胡塵。太白詩也。人或譏
其大言不慚然。其時鄴侯汾陽均未顯用。殆有所指非
自況也。至王荊公浪淘沙云。伊呂兩衰翁。歷徧窮通。興
王只在笑談中。及至而今千載下。誰與爭功。則隱然欲
與爭雄矣。乃新法一行。卒肇靖康之禍。何哉。跡公生平
好更張。好立異。好人諛。已有此三好。遂致病國殃民。而

不自覺其得保首領以歿。猶幸當國不久。逮蔡京輩。創
爲紹述土崩之勢。遂成此公所不及知者。公又有漁家
傲云。平岸小橋干嶂抱。揉藍一水。縈花草。茅屋數間窗
窈窕。塵不到。時時自有清風掃。○午枕覺來聞語鳥。敲
眠似聽朝雞早。忽憶故人今總老。貪夢好。茫茫忘了邯
鄲道。使公九原有知。亦曾自悔。誤貪好夢否耶。吁。公非
小人而所用盡。小人謂爲禍梯。夫復奚辭。

長洲蔣雲九大令邀人賦送臘詞華亭莊社如

永言

分

得門丞二郎神云。丞何故。曷不學。老罷當路。曷不學。辛
昆持節坐。慣依傍。別人庭戶。金鎖綠沈無恙在。做綵燕。

黏雞伴侶。難道爲一椽堪蔽。強似牽舟賃廡。○休住。尋
常巷陌。冷清清處。只合倚侯門相努目。乘勢作霍家奴。
怒。畫戟收時。行馬駐。有多少。炎趨熱附。看槐柳行邊。二
陸三潘。向君延伫。似嘲似謔。寄慨不少。二陸三潘。句本
世說。大令名之。遼康熙中。官知縣。咏春聯。迎春樂云。辛
盤薦罷。人微醉。指拂凌雲氣。倚雙行椽燭。搖紅膩。把十
樣桃箋試。○儷句摘玉臺佳麗。法書仿蘭亭。適媚何處。
紗籠前導。又索宜春字。較爲蘊藉。

漳浦藍鹿洲

鼎元

工古文。少與上杭劉鰲石

坊

友善。以

文章經濟相期。最顧貧甚。著餓鄉記。以自慰。爲諸生受

知張清恪

伯行

旋從其族兄臺澎總兵

廷珍

平臺灣朱

一貴之亂羽書露布咸出其手雍正初貢入太學以保舉官廣東普甯令失上官意被劾逮繫久之事白

世宗召見卽授廣州知府際遇可謂奇甚莅任甫逾月卒於官致未竟所施今鹿洲集閩中盛行而詩詞缺如鼇石老於幕府遺文散佚鮮有知其名氏者余僅見其踏莎行云老樹當門修蘿覆屋平蕪無復年時綠閒來小閣聽松濤倚闌凝斷遙天目○古戍風淒野田禾熟兒童拍手驅黃犢暮煙濃合欲棲鴉行人猶唱南征曲又登南嶽望月臺西江月云臺址高凌北斗月華清映

平川。今宵剛值十分圓。卻恐征人怕見。○四野蛩聲如泣。千山夜色凝寒。一年能得幾回看。況在祝融峰畔。錄之以存其概。

先曾祖菊圃公登乾隆癸酉秋榜官浙之常山縣著詩鈔四卷附詞十餘闕與先高祖逸園公詩草版均儲

藏三先伯叔才公家傳之從兄蓉舫

文炳

亦知珍庋歲

庚申邑爲賊陷從兄殉難詩版譜牒悉遭焚燬今祇存逸園詩草一卷菊圃公詩詞已無存本僅記春日憩管社山浪淘沙云青嶂擁晴沙。幾簇人家。眼前桃李豔於霞。知費天工多少力。釀就繁華。○煙水望中賒。繞徑

桑麻武陵何必更浮槎。長晝悒悒無箇事。看放蜂衙。題
友人漁隱圖。解珮令云。藕花千頃。桃花一棹。又開殘白
蘋。紅蓼。隨意風帆。任南北。東西都好。計生涯。此中粗了。
○停橈近浦。收綸斜照。且休論。得魚多少。換酒歸來。拚
一覺。醉眠忘曉。這襟懷。儘看娛老。其餘詩詞。不能一一
追憶。謹錄於此。用誌永憾。公諱如琦。鄱陽陳字填。

先祖西園公。著有西園賸稿。瑣述二種。瑣述記遺聞佚
事。賸稿則詩詞襍文。皆叔才公鈔撮收藏。因循未梓。亦
遭賊燬。幸昔年在里鈔存。瑣述數則。並詞數闕。悔未全
錄。致手澤與音容俱渺。追恨無及矣。先祖官陝右甯

羌時關署東小園爲憩息地春日偶題臨江仙云絲雨
悵悵飄未已遙山半被雲遮小園堪擬庾公家數竿君
子竹一徑美人花○清晝垂簾無箇事茗鑪閒試新茶
眼前生趣足相誇燕兒營夏屋蜂使放朝衙秋夜聞笛
高陽臺云晚照留紅寒煙弄碧金飈吹滿山城倦倚雕
闌誰家玉笛飛聲梅花落盡人何處便無愁也喚愁生
况涼州別調新翻越樣淒清○柯亭舊韻何堪問賸關
山月色千里同明懊恨桓伊催教繡閣心驚陌頭楊柳
蕭疎甚頓牽來無數離情又長空塞雁爭飛相和悲鳴
叔才公云此詞因新易大府政令嚴急官皆惴惴迎合

意旨更不遑顧及民事名爲整頓吏治而吏治益偷故
託之聞笛以寄慨云又望雨踏莎行云五雀鳴春窗雞
報曉捲簾薄霧籠幽草山家正在望甘霖鳩啼屋角聽
來好○潤葉愁微霑枝恨小東風莫把濃雲掃年光輸
與柳條多依依不覺春將老新秋鵲橋仙云輕雷送雨
涼飈錢夏一榻清虛無暑果然茗飲勝杯香量水倚疎
簾自煮○巢燕將歸林蟬乍歇又聽搗衣砧杵微吟欲
覓和人難只索向秋蟲細語於一詞具見政簡刑清脩
然自得之况儀生彌月隨先君子至陝七歲方離州
廨園中風景猶約略能記今四十餘年矣

公諱瀚
陳宇填

多麗一名綠頭鴨各家平韻詞俱一百三十九字獨李
漳詞少二字蓋前段頻慘啼痕句脫頻字後段帳冷衾
寒句脫冷字中如枉勞作漫勞塞雁作塞鴻滯芳尊作
清芳尊均誤惟今宵爲誰句誰字平聲微與各家不同
其詞云好人人去來欲見無因記當時竊香倚暖豈期
蝶散鷗分到而今枉勞夢想嗟後會頻慘啼痕繡閣銀
屏知他何處一重山盡一重雲暮天杳梗踪萍跡還是
寄孤邨寂寥月今宵爲誰虛照黃昏○細追思深誠密
意黯然一晌銷魂仗游魚漫傳尺素望塞雁空憶回文
帳冷衾寒香消塵滿博山沉水更誰熏斷腸也無聊情

味惟是滯芳尊。沉吟久，移燈向壁，掩上重門。又元人失
名之傳，按察錢塘懷古，前調云：靜中看，循環興廢，無端
記昔日淮山隱隱，宛若虎踞龍蟠。下襄樊，指揮湘漢，鞭
雲騎，圍繞江干。勢不成三時，當混一，過唐之數，不爲難。
誰知道，倉皇南渡，半壁幾何間。陳橋驛，孤兒寡婦，久假
當還。○挂征帆，龍舟催發，紫宸初卷朝班。禁庭空，土花
暈碧，輦路悄，呵喝聲乾。去國三年，遊仙一夢，依然天淡
夕陽閑。縱餘得西湖風景，花柳亦凋殘。昨宵也，一輪明
月，還照臨安。通首本屬完善詞綜，未經細考，於調名既
訛，爲鴨頭綠前段脫落，循環句六字，誰知二句十二字。

遂祇有一百二十一字後段去國三句又誤在縱餘二句之下致文理亦不貫此錯落之最甚者

虞山蔣伯生大令

因培

詩文敏贍工繪事顧跡弛不羈

酒後好嫚罵或規之輒曰我罵俗人耳何預乃事入貲官山左大吏惜其才咸優容之屢躡屢起卒至被黜謫戍及赦回卽賦詩云入門先向妻孥笑吾戴吾頭今又歸其誕如此所著隨手亡失僅於嚴小秋集中見其題餐花館圖金縷曲云好在詞人屋間陂塘幾時買斷青溪曲曲門對南朝江令宅隨意數竿修竹更位置笛牀碁局怪底胸中無俗豔算輸君飽飲秦淮綠天最惜此

清福。○年來載酒江湖熟。記天涯、相逢幾度。西窗翦燭。
照影南池池上水。不似舊時面目。多荒了、故園松菊。殘
客飄零才子老。嘆龜肩、斗酒無人續。何處覓一囊粟。後
數語猶足見不可一世之概。先是遂甯張船山太守問

陶負狂名由翰林出守萊州。或言外吏非京員比。宜稍
斂抑。太守然之。初謁中丞。執禮甚恭。談次中丞譽其驛
柳詩。不覺撫掌笑曰。爾亦知吾驛。柳詩耶。中丞陰銜之。
齟齬不已。未數月。引疾無以歸。浪跡吳門。旋卒。視伯生
所遇有幸有不幸矣。

明霞失其姓。明湖州司理馮楨卿姬歿。葬吳興之峴山。

康熙時德清蔡氏召仙乩書云生長臨清十七年偶隨
車馬到茗川知心惟有墳前草夜夜臨風泣杜鵑末署
十景塘明霞題嘉慶初茗中詞人爲之封土易碑吳君
蘭洲並爲寫像奚明經榆樓疑賦高陽臺云長夜鵲啼
空山葉落一坏埋沒荒榛二百餘年淒涼殘月黃昏樵
蘇不禁狴狐穴最堪憐泣損芳魂費詞人香土重添苔
碣重新○城南自古傷心地歎石蒲齋冷風雅沉淪好
倩吳郎憑將彩筆傳神生前東海難填恨且休提幽夢
爲雲醉斜曛攜得清泉倒盡清尊原註石蒲司理齋名一時和者
甚衆周已雲侍御學清亦倚前調云夢亦爲雲魂猶墮

淚斷腸桃葉江船。一樹棠梨。殯宮寒食年年。年來剝盡
殘碑字。甚前塵密愛深憐。最潸然。宰木頽陽。蔓草荒煙。
○晷燈不照重泉夜。但樵歌野徑。漁笛晴川。環珮歸來。
傷心金粟堆邊。荒尊爲酌。詞人酒護香泥。好傍鴛眠對
紋簾尾。展青鸞泣憶紅鵲。原註吳園次太守曾瘞鴛鴦
於墓側司理善繪竹其風篠
石刻至今
尚有藏者

吾邑杜雲川太史

詔

先以監生膺薦食七品俸預輯歷

代詩餘蒙

恩賜進士復與諸詞臣纂修詞譜逮授庶

吉士卽乞養歸生平恬退寡營少時從顧梁汾嚴藕漁
兩先生遊故其詞如水碧金膏纖塵不染罄陽對月祝

英臺近云夜何其雲忽破山小月光大貼玉團圓直欲
向人墮轉思客裏多年幾番圓了慣照見客愁無那○
可知我數來十日歸程熬陽又將過笑脫青衫獨自卷
簾坐無端千里鄉心一宵鄉夢共兒女小窗燈火南鄉
子云絮語曲闌邊小炷金猊窄袖偏手約篆絲風不定
憑肩一袖香分兩袖煙○幾欲卸頭眠翠被重熏夢不
圓錯認柔鄉容易住從前纔著思量便渺然沙塞子云
銷愁擬倩餘醒奈夢裏人孤易醒况更值薄寒時序風
颭疎櫺○迴廊曲處悄無聲正燭滅香消盡屏誰知我
卷簾樓上看落春星太史選有唐詩叩彈集專以中晚

爲宗堪救麤豪之失

歌以木音爲節古用祝敵後世易以板往往見於詞中
六一詞云檀板未終人又去子野詞云緩板香檀唱徹
伊家新製海野詞云絲管暗隨檀板曰緩曰隨曰未終
其節奏猶可想見亦有用象牙者吹劒錄所謂柳郎中
詞只合十七八女郎按紅牙板唱楊柳岸曉風殘月子
昂詞云輕敲象板緩歌金縷是也然莫詳其製近人斲
木三片貫繩於端以一手拍之獨臺灣北里中聯木六
片兩手捧拍云是前朝大樂所遺初謂齊東野人語耳
後見王元之禹偁小畜集有拍板謠云麻姑親採扶桑

木鏤脆排焦其數六雙成捧立王母前曾按瑤池白雲
曲始恍然臺陽所見尙是古製近世減六爲三益趨簡
便無復有雙手捧拍者矣排焦二字不知何解

柳耆卿七夕二郎神云炎光謝過暮雨芳塵輕灑乍露
冷風清庭戶爽天如水玉鉤遙掛應是星娥嗟久阻敘
舊約。飈輪欲駕極目處微雲暗度耿耿銀河高瀉。○閒
雅須知此景古今無價。運巧思穿針樓上女擡粉面雲
鬢相亞。鈿合金釵私語處算誰在迴廊影下。願天上人
間占得歡娛年年今夜。首句有作炎光初謝者乃沈天
羽妄增不足據。二郎神本有二字起一體王梅溪詠海

棠詞正與此同。惟中間多押四韻。後結句讀平仄稍異而已。其詞云：深深院。夜雨過。簾櫳高卷。正蒲檻海棠開欲半。仍朶朶紅深紅淺。遙認三千宮女面。勻點點胭脂未徧。更微帶春醪宿酒。嫋娜香肌嬌豔。○日暖芳心暗吐。含羞輕顫。笑繁杏天桃爭爛漫。愛容易出牆臨岸。子美當年遊蜀苑。又豈是無心眷戀。都只爲天生麗質。難把詩工裁翦。寓意微婉。不當僅作咏物詞讀。

宋曹勛作透碧霄詞一百十七字。較柳永查莖所填一百十二字。體句讀迥異。萬氏未見曹集。致未收入。又一體柳查二作字句相同。而查作尤佳。其詞云：艤蘭舟十

分端是載離愁。練波送遠，屏山遮斷，此去難留。相從爭奈，心期久要，屢變霜秋。歎人生，宛似萍浮。又翻成輕別，都將深恨，付與東流。○想斜陽影裏，寒煙明處，雙槳去悠悠。愛渚梅幽香動，采掇須倩纖柔。豔歌粲發，誰傳餘韻，來說仙遊。念故人，滯此遐州。但春風老後，秋月圓時，獨倚江樓。換頭三語，真是繪水繪聲之筆。詞綜錄此詞，宛似作杳似滯，此作留，此似不如宛字滯字。又採掇句，本作須采掇，倩纖柔六字折腰，與柳詞空恁鞦韆垂鞭句法小異。詞律謂文義亦有可疑，若作采掇，須倩纖柔，則理順語協，宜從之。

唐益庵廣文見余詞補中錄吳蓮洋詞藕絲何用尋孔
句疑有誤字憶謝皋羽海上曲云水花生雲起如葑神
龍下宿藕絲孔當是所本至謝詩所用何典余自慚荒
陋不復能省周季貺司馬謂用內典帝釋事余於釋教
素未究心家亦無其書帝釋事如何至今未解詞係雪
中過曹正子次韻調寄摸魚兒云雪初飛林塘竹樹極
杪禿尾銀鳳紙窗活火茶煙繞那管夜來寒重書塞棟
喜更有貂幃犀押珊瑚控塤篴伯仲况千里剛來天涯
一笑且摘紫髯凍○玉龍吼輦下雙成嬌董藕絲何用
尋孔但憑銀甲漫天舞意興一般飛動綿竹頌恰羔雁

方將杞梓梗楠貢金蓮地湧卻結想龍華遊思鵬運夏
玉破塵夢蓮洋名雯字天章蒲州人康熙中舉鴻博未
遇詩學李供奉漁洋門下應推第一

男承禧校字

聽秋聲館詞話卷二

無錫丁紹儀杏舫

國初吾邑書家稱孫高嚴華余少時見故家聯匾多四
家書亂後胥成灰燼矣家有靜安堂字卽孫書今堂在
而匾已無有孫名竝禾字稚均筆勁如鐵世推第一以
布衣終高名世泰字彙旃前明進士曾官提學僉事詞
均無傳嚴卽藕漁中允有秋水軒詞華名長發字商原
邑諸生著有滄江詞浣溪紗云照水新妝帶夢催嬾拈
針線下層臺小庭扶倦摘青梅○愁聽嬌鶯穿樹去怕
看棲燕入簾來雛鬟空自報花開蝶戀花云穠春正好

人何處。一縷柔情。遠繫天南樹。妾夢不離江上雨。郎心
已逐風中絮。○極目天邊鴻雁路。爭似雕梁燕子雙棲
暮。幾度問天天不語。花時又把歸期誤。清平樂云。冶春
過了。悔煞當初好。一霎相逢真草草。裙帶鬆來多少。○
黛螺愛染眉長。羅衫熏透鑪香。時把菱花私照。也還直
得思量。風致不減秋水。其卽事詩有。千櫓影裏宵鳴柝。
萬馬聲中晝閉門。官路半淹三月雨。人家全寄五湖村。
句想見軍行所至。并邑蕭條景象。

康熙己未召試博學鴻詞。吾鄉嚴蓀友中允。

繩孫

適病

甚祇成省耕一詩。不得進呈。

聖祖久知其名。謂史館不可無此人。引唐人祖詠南山
陰嶺秀二十字入選。故事特授檢討。預修明史。爲四布
衣之一。旋轉中允。乞病歸家。居藕蕩橋。自稱藕漁。夙擅
三絕。稱詩詞尤鮮潔。中秋御街行云。算來不似瀟瀟雨。
有箇安愁處。而今把酒問姮娥。是甚廣寒心緒。隻輪飛
上天街如水。不管人羈旅。○霓裳罷按當時譜。一片清
砧苦。西風白騎幾人歸。腸斷綠窗兒女。數聲殘角。催他
來雁。遠向瀟湘去。菩薩蠻云。君恩自古如流水。梨園又
選良家子。都作六宮愁。傳言放杜秋。○不須誇豔冶。明
日承恩者。淡掃便朝天。路人知可憐。二詞似有所諷。願

選家均遺之。又有答顧梁汾見懷七絕云。瞳瞳曉日鳳
城開。纔是仙郎下直回。絳蠟未消封詔罷。滿身清露落
宮槐。頗有唐人風韻。四布衣者。富平李天生。因篤秀水
朱竹垞。彝尊吳江潘次耕。耒俱由布衣入翰林。尚有長
洲馮方寅。鼎亦以布衣舉同授檢討。著述未見世。鮮有
稱及者。

史梅溪燕歸梁云。獨卧秋窗桂未香。怕雨點飄涼。玉人
只在楚雲旁。也著淚。過昏黃。○西風今夜梧桐冷。斷無
夢到鴛鴦。秋鉦二十五聲長。請各自耐思量。竹垞太史
仿其意而變其辭。爲桂殿秋云。思往事。渡江干。青蛾低

喚越山看。共眠一舸聽秋雨。小簾輕袂各自寒。較梅溪
詞尤含意無盡。太史於南北宋詞兼收並采。蔚爲一代
詞宗。顧僅以玉田自擬。自題詞稿解珮令云。十年磨劒。
五陵結客。把平生。涕淚飄盡。老去填詞。一半是空中傳
恨。幾曾圍燕釵蟬鬢。○不師秦七。不師黃九。倚新聲。玉
田差近。落拓江湖。且分付。歌筵紅粉。料封侯白頭無分。
集中言情諸作。羌無故實。可知卽風懷詩亦未必真有
所指。乃朱石君相國猶以未刪爲恨。翁覃溪學士言太
史欲刪未忍。至繞几回旋。終夜不寐。想均未細繹前詞
耳。太史以布衣舉鴻博。入詞垣。

賜第內城出主江南試亨衢方騁旋爲忌者所中投劾
歸道出揚州嵯商安氏奉萬金爲著書資遂得優游終
老其解珮令第三句原作涕淚都飄盡乃沿汲古閣刊
晏叔原詞團扇無緒於緒字上衍一情字之誤考花草
粹編本祇四字宋元各家詞均無作五字句者

歲乙卯道出邵武鐵嶺宜泉司馬

興廉

觴余丞廨出示

所藏書畫辨證真贋甚確余實懵然不解見其冊頁中
夾一小箋題宿慈救寺調寄鷓鴣天云霞散高樓月在
天蛩聲滿院烏初眠石牀曾爲彈碁掃蕉露還因點易
研○燈似豆夜如年一簾香裊獸鑪煙閑心領取清涼

味不慕遊仙不問禪。款書春園二字詢之知爲宗室德
崇作以天潢貴胄而詞意極澄淡因亟錄之宜泉原
名興義隸旗籍嘉慶己卯孝廉任侯官令蹶而復起升
鹿港同知卒於任聞余輯補詞綜由海外寄詞數十闕
囑爲點定自題待月圖祝英臺近云隙中駒石中火斜
日又西墮似水年華生計不須左算來媚佛求仙都無
憑準且消受片時清坐○早覷破任他顛倒榮枯休把
兩眉鎖大好園林客得眼前我莫嫌影隻形孤舉頭邀
月便湊上影兒三箇寫春明輿夢圖送吳伯鈞明府入
都風入松云軟紅塵外策征鞍涼夜正漫漫長堤月色

平橋水潑清光。一片澄鮮。濃綠萬家拖柳。暗香十里吹蓮。○春明景物想依然。空惹夢魂牽。扁舟也擬謀歸棹。恐歸時。不似從前。把筆幾回惆悵。天涯飄泊。年年題陳少香大令鷗汀漁隱圖。金縷曲云。煙水浮家好。掉扁舟。載將簪笻證盟沙鳥。半世名場酣戰罷。贏得詩囊畫稿。又攜箇素心同調。海上更無蘇叔黨。祇朝雲長伴東坡老。看問字。鳳雛小。○人生難得休官早。憶華年。吳山楚水。恣情遊眺。嬾去紅塵尋舊夢。都爲邯鄲睡飽。且料理。筆牀茶竈。莫向叢蘆深處泊。怕花飛。霑鬢愁難掃。身外事。任顛倒。宜泉工畫喜爲詞。精音律。彈絲振竹。斤斤不

失分。今不復聞矣。

宜泉見寄詞稿中附郭仲和明府

應辰

贈渠之任光澤

金縷曲云。七尺書生耳。看意氣。當今無輩。何論餘子。不
向鈞天廣雅奏。來試絃歌百里。豈造物。生才本意。失喜
萍逢。纔兩月。悵笛聲。又逐驪歌起。一枝櫓。半江水。○清
秋風景。沿溪美。映篷窗。層嵐回互。好參畫理。想見政成
饒勝賞。露冕枕椰陰裏。且莫道。牽絲無味。我輩祇留真
面目。任家家。繡出平原似。金鑄賈。請隗始。仲和全椒人。
由己卯翰林改官。聞中緣事降。華對縣丞。贈贈宦途幾
二十年。以知縣終。

江南春爲倪雲林高士自度曲與宋褰穆護砂同爲元
調雖篇中均七言句然前後四換韻換頭係三字兩句
明明是詞非詩乃詞譜詞律均未收入後人亦無填用
者吾鄉薛國符方伯

信辰

有賦本意一闕云絳口櫻桃

玉板筍。白舌啼殘深院靜。畫船簫鼓水中煙。綠柳鞦韆
牆外影。十分春色三分冷。玉輪正照梧桐井。花前步障
葛綸巾。香風十里斷紅塵。○蝶舞忙。鶯歌急。麥苗細雨
濛濛溼。六朝脂粉悲何及。草邊千古燐猶碧。笙簧臺榭
仍都邑。惟見青山萬仞立。韶光駒隙身浮萍。舟車川陸
方營營。方伯登順治己丑進士任潮州知府守將郝尙

久叛方伯被拘密約總兵吳六奇攻城已爲內應謀泄
兵已加頸矣紳民泣請得暫繫事平獲免存擢至浙江
布政使

秦少游八六子云倚危亭恨如芳草萋萋剗盡還生念
柳外青驄別後水邊紅袂分時愴然暗驚○無端天與
娉婷夜月一簾幽夢春風十里柔情奈回首歡娛漸隨
流水素絃聲斷翠綃香減那堪片片飛花弄晚濛濛殘
雨籠晴正銷凝黃鸝又啼數聲與李演詞云乍鷗邊一
番腴綠流紅又怨蘋花看晚吹約晴歸路夕陽分落漁
家輕雲半遮○縈情芳草無涯還報舞香一曲玉瓢幾

許春華。正細柳青煙。舊時芳陌。小桃朱戶。去年人面。誰
知此日。重來繫馬。東風淡墨。敲鴉。黯窗紗。人歸綠陰自
斜。字句平仄如一。惟李詞首句不起韻。第五句用韻。與
秦稍異。詞律謂秦詞恐有訛處。未必然也。至秦詞奈回
首作怎奈。向李詞玉瓢作玉飄。均係傳鈔之誤。又詞律
因李詞脫舊時芳陌四字。遂列八十四字爲又一體。似
尙未見絕妙好詞本。且誤李濱爲李濱者。有宋詞家無
李濱其人。祇李演號秋堂有盟鷗集。

昔年十五。雖捉筆爲文。實無所解。先君子請先伯
父子。初公課讀。盡屏室中書。祇留左傳史記各一部。明

文十餘篇每篇定讀千徧爲度倦則誦史記左傳數篇亦須百徧或摘取其中事句堪爲文用者分類錄之如是兩月餘始命題作文每題必作七八篇毋許一意雷同課餘襍談詩歌詞賦以及稗官野說旁引側證卒歸於文常言力不專則學不進識不廣則思不靈今獲有一知半解皆伯父曲成之乃老大無成徒呼負負愧也奚如伯父爲諸生久困公車以流外官需次晉中與大吏忤謫成烏魯木齊道光元年

特旨釋回平生詩文咸信筆直書不求工而自然穩鍊如經古浪道浣溪紗云匹馬馱來萬斛愁萍踪遠逐野

雲浮新聲聽到古涼州。○迎面晚山含日冷。夾車新水帶水流。濃春煙景似深秋。爲席靖庵題吹簫圖減字木蘭花云。流鶯漸老。人生行樂應須早。柳媚桃夭。認取春光塞上嬌。○洞簫一曲。生綃貌出人如玉。莫奏清商。且盡尊前現在觴。眼兒媚云。天山雪後凍嶙峋。寒極似無春。推窗試看。淩兢梅萼。也減精神。○拈毫欲賦硯池冰。誰繼兔園塵。拚教今夜。割鮮行炙。醉吐車茵。皆出關時所作

先伯父雙梧公

榕

嘉慶戊辰舉京兆第二。人次年春闈

報罷不無邇邇偶感寒疾時館勒侯

保

家誤服參茸遂

不起年僅二十有四詩文均散佚祇存數詞采桑子云
瓊樓曉起銀屏凍。莫倚危闌。又倚危闌。雁送西風撲面
寒。○聲聲碎玉鳴簷鐵。怕說心酸。早已心酸。冰雪關河
去住難。浣溪紗云繞過清明上巳天。鶯喉漸老柳飛綿。
東風吹送雨廉纖。○懊惱一春愁裏過。未曾把酒杏花
前。江干閒煞木蘭船。蘇幕遮云暮寒生。香霧重。芳草春
遲未透。堦兒縫。疎影橫窗偏耐凍。新月多情。又把花枝
弄。○夜方長。誰與共。枉刺鴛鴦。繡被還孤擁。聽得簫聲
天外送。何日秦樓。攜手騎雙鳳。滿庭芳云雨醒輕寒風
催小霽。一庭夜合開齊。瑣窗夢醒。恰恰乳鶯啼。最是燕

兒無賴。晶簾畔。污徧芹泥。情何限。玉笙吹罷。獨倚畫闌
西。○天涯歸信杳。裙腰芳草。綠滿長堤。對蕉書半展。如
見封題。向晚新螢飛度。穿珠箔。欲上還低。翻輸與。錦鴛
狎水。雙宿又雙棲。新月木蘭花慢。云柳梢光半吐。殘雨
歇。小庭幽。似鏡匣微開。纔呈一線。試照瓊樓。姮娥諒多
幽恨。淡眉痕。曲寫遠山愁。想見金波蕩漾。潛鱗也怯吞
鉤。○象梳斜傍玉搔頭。綺閣晚妝收。正雲母屏空。水晶
簾捲。獨倚篴篴。清輝未能久駐。悵黃昏。寂寞思悠悠。誰
炷心香遙拜。背人細語無依。咏新月而言未能久駐。竟
成語識。

鄆縣周克延聞雁有懷連理枝云多少蘆花渡多少楓
林路帶月衝霜。嗚嗚咽咽。誰憐倦羽。甚年年覓食不辭
勞。向南天飛度。○欲向天南住。合往羅浮去。若到羅浮。
吾家伯仲。正相團聚。爲寄聲黃葉故園中。賸殘陽一樹。
似仿古今詞話無名氏聽雁之作調寄御街行又名孤
雁兒云霜風漸緊寒侵被。聽孤雁聲嘹唳。一聲聲送一
聲悲。雲淡碧天如水。披衣起告雁兒略住。聽我些兒事。
○塔兒南畔城兒裏。第三箇橋兒外。瀕河西岸小紅樓。
樓外梧桐雕砌。請教且與低聲飛過。那裏有人人無寐。
此詞較詞律所收范文正公詞多二字應是又一體。又樂府雅詞無名氏仄韻滿

庭芳云風急霜濃天低雲淡過來孤雁聲切雁兒且住
略聽自家說你爲離群到此我共那人人纔別松江岸
黃蘆叢裏天更待飛雪○聲聲腸欲斷和我珠淚點點
成血這一江流水流也嗚咽告你高飛遠舉前程事永
無磨折須知道飄零聚散終有見時節此調詞律失收意致亦
相似惜近俳體非詞家正宗克延名世緒嘉慶初諸生
早卒有壽蓀山館詞其拜張忠烈墓金縷曲激昂悲慨
雅與題稱詞云拚濺刀鋌血尙從容湖頭遙望鳳凰山
色席捲大江南北去快比呼盧一擲怪松杪雙猿聲咽
采蕨西山吟未罷牧羊歌完卻蘇卿節秋九月初七

○吾家素近先生宅。慘蕭寥。楊家河畔。滿門荆棘。岳墓
于墳留隙地。補種松楸青密。更殉義。三人同烈。明日孤
山梅下拜。再東頭。靈隱尋殘碣。重酌酒。麗牲石。原註楊
方葬孤山。魏雪
寶山人葬靈隱。按忠烈名煌。言順治中。遙奉明朔。圖恢
復。兵敗遁居海島。常叅雙猿縱之樹杪。見舟師至。輒悲
鳴。得先期避去。久之。浙帥募人撲殺雙猿。執公至杭州。
盡節。乾隆中。予謚。

師宗何璜溪太守

渭珍

由戊子孝廉官江夏令。雖任繁

劇。而不善趨承。與大吏時有牴牾。嘗言古之爲政者。講
求水利。農田學校。今則不然。奔走供帳。應對而已。偶同

宿山坡驛舍見余聞雁有懷詞意有所感賦蝶戀花云
千里瀟湘雲樹暮。殘角聲中。陣陣哀鴻度。舊侶相逢應
共語。天涯誰念銜蘆苦。○何事秋來春便去。浩蕩江湖。
不少堪棲處。卻憶三春芳草渡。安眠輸與閑鷗鷺。後汴
升漢中知府旋卒余詞隨手棄擲不復省憶君詞猶約
略能記回首前塵曾幾何時君之墓木應拱矣

舒亶字信道與蘇門四學士同時詞亦不減秦黃花庵
詞選錄其菩薩蠻云畫船槌鼓催君去。高樓把酒留君
住。去住若爲情。江頭潮欲平。○江潮容易得。只是人南
北。今日此尊空。與君何日同。樂府雅詞錄其蝶戀花云

最是西風吹不斷。心頭往事歌中怨。木蘭花云西湖一
頃白菱花。惆悵行雲無覓處。虞美人云背飛雙燕貼雲
寒。獨向小樓東畔倚闌看。縱不識字人亦知是天生好
語人。因其傾陷坡公已亦不免被斥惡其人並陋其詞
此如蔡京之書巖嵩之詩馬士英之畫初不讓蔡君謨
王元美董香光諸公。今詞壇藝苑中絕無齒及者在。小
人得志之秋。率意逕行。非不炫赫一時。卒之身敗名裂。
卽有寸長。曾不如豹皮雀尾。猶足供人玩惜。昔與楊伯
夔丈談及此。丈笑曰。此所謂醉裏且貪歡笑。要愁那得。
工夫使秦人而知自哀。亦不爲秦人矣。

唐宋歌曲每以邊地爲名如甘州伊州涼州皆隸今之
甘肅其人宜善歌顧無聞焉余輯 國朝詞綜補缺甘
肅廣西二省無可采訪向見春閨倦繡圖一軸上題菩
薩蠻云瑣窗殘線黏紅唾香巢雙燕窺人坐風景尙如
前春歸又一年○楊花吹似雪故故穿簾入倚徧碧闌
干誰憐翠袖單詞甚佳而無款識辨其章爲陶泉二字
憶道光中俞都轉德淵字陶泉甘肅平羅人由江甯知
府洊擢兩淮運使詞未必都轉作姑繫之都轉名下以
補隴西之缺

長洲陳子玉

山壽

爲詩人秋史子苔縫掃地遊云惜惜

成片正繡徧庭心。地衣凝翠。沿堦沒砌。乍鬢影未滿。一
絲猶細。吹陣尖風。翦破春痕有幾。紛無次。認亂髮乍梳。
分半挑起。○三寸襪羅底。只鳳嘴鞋尖也。應迴避。行行
且止。怕匆匆踏損。草芽花子。細界條條。直似烏絲闌紙。
秋來矣。老吟蛩。此中身世。簾波瑣窗寒。云細織千絲。低
垂一桁。小樓深處。輕颺乍起。吹縐縠紋縷縷。盪春光微
茫可憐。疊影圓痕可描否。似盈盈一水。飛花飛絮。濺來
無數。○流去。閑庭宇。正月影中央。冥濛隔住。是誰翦出。
半幅吳淞如許。聽聲聲。迎風珮珊。隱約淩波見微步。瀉
苔堦。一片空明。不管吟蛩苦。瓣香頻伽可稱逼肖。

丹陽姜元章孝廉藻與先曾祖同年有韻石齋詞春
暮江城子云牡丹開後綠陰齊。盡闌低。蝶來稀。九十韶
光都變。柳花飛。那是燕銜春色去。花落盡。燕驚啼。○幽
堦絲雨浥香泥。掩銅扉。怕春歸。歸去重來。動是隔年期。
誰送好春天樣遠。登樓望。草萋萋。當有所慨而作

宋范文穆

致能

曾館姜白石於石湖後此吳夢窗張玉

田亦寄跡焉道光初吳門諸詞家擬於石湖建祠祀三
詞人陳小松明經賦詞代引即用白石所製石湖仙云
詞人秋老。記團笠攜筇。遊屐曾到。清夢幾回圓。指微波、
芳踪未杳。閑雲孤鶴。定愛看。白蘋紅蓼。斜照水仙祠。霧

暗煙繞。○當年嘯歌舊地。盼重來。翩然倚棹。水鏡空濛。
覓徧吟魂多少。羽扇綸巾。片香殘稿。一番鴻爪。尋伴好。
詩翁尙有遺廟。小松原名兆元。後更彬華幕遊。以終著。
有瑤碧詞新作探春之讌。酒邊賦曲。游春云乍過。收
燈雨。早柳舒梅放。煙暗庭院。第一關心。是香車花外。徑
平莎軟。約略風簾捲。看燕子。飛來渾倦。愛筵端鬪盡妍。
蛾。山色對窗平遠。○晝短。蘭啼珠怨。又蠟淚堆成。玉釵
敲斷。羅綺嬌時。惱芳情偏在。鬢蟬斜顫。故把鶯期緩。莫
厭見。飄燈湖岸。剩夜來。被酒歸眠。愁和月滿。此詞用施
岳體較詞

律所收
多一字

國朝兩舉鴻博康熙己未取五十人吾鄉二人爲秦對
巖諭德嚴繩孫中允乾隆丙辰取十五人丁巳補試復
取四人吾鄉僅選楊大令

度汪

一人由貢生授庶吉士

出知江西德興縣秦嚴俱有撰著獨大令著述無傳其
孫湘槎名汝燮余中表丈也以諸生老於幕府有詞二
卷余曾摘鈔十餘闕亂後後人襄謝恐全稿佚矣最佳
者眼兒媚云淒涼獨倚玉闌邊。嬾整舊釵鈿。許多閑事
纔添香屑。又上琴絃。○語風莫攪鴛鴦夢。池畔正雙眠。
數層波縠。千條菰線。幾箇荷錢。浣溪紗云袖底紅巾裹
指尖。不彈珠淚向花前。怕花憔悴損花顏。○滿院尙留

香宛宛。隔簾初住。雨纖纖。苔痕青到茜裙邊。天仙子云
小立閒階。嫌露冷。愛看月明圓。似鏡。手扶羅幕上銀鈎。
闌獨凭。傷春景。吹落梨花風不定。○深院漏殘人乍靜。
前夜夢兒空記省。卸頭燈背未眠時。心欲併。肩還竝。笑
指雙屏上影。清平樂云。暖回繡戶。昨夜寒如許。粉蝶
穿籬忙不住。一霎花開滿樹。○鏡邊正挽香鬟。檀奴遊
倦初還。聽說春山多媚。今朝倩畫春山。巫山一段雲云。
窗外鶯聲碎。池邊草色新。一彎淡抹遠山痕。低斂似眉
顰。○插鬢花愁瘦。熏衣麝怕溫。東風吹老眼前春。腸斷
倚樓人。揚州慢云。香袖長垂。翠樓閒倚。捲簾十里新晴。

聽新腔水調。正夜月初生。幾回過臨江竹徑。隔煙回首。
曾認青青。算芳春好景。淮南第一揚城。○而今寂寞。賸
紅橋波影空橫。自爛漫花飛。風流夢覺。莫再多情。三十
六宮禾黍。牆高處古樹雲平。更雷塘。淒雨孤舟。愁絕殘
更。此詞殆作於淮鹽改票後。揚州爲鹽院駐節地。繁盛
甲東南。道光閒陶文毅海請改票運。雖取效一時。而鹺
商失業。市景日落。不無今昔之慨。

彭義門少宰

孫通

康熙中由主事舉鴻博。第一人官至

侍郎。所著延露詞。或推爲本朝第一。或訾爲浪得才名。
皆非篤論。其旨趣頗近歐晏。微乏風骨。且未精純耳。王

氏詞綜錄其生查子云薄醉不成歡。轉覺春寒重。鴛枕有誰同。夜夜和愁共。○夢好恰如真。事往翻如夢。起立悄無言。殘月生西弄。鴛枕本作枕。席蘭泉司寇爲易鴛字。詩詞之辨正在乎此。非深得詞家三昧者不解。司寇所錄各家詞每多點竄。甚且改至二三十字。如李笠湖漁浪淘沙詞後闕四句。竟全易之。若照原本不堪入選。惜調弄字脫未校改者。尙不勝枚舉。如少宰宴清都。花心動綺羅。香三闕。悉沿嘯餘之訛。殊不合格。仇山村所謂言順律乖者是也。

男承禧校字

聽秋聲館詞話卷三

無錫丁紹儀杏舲

吾郡孫淵如觀察以乾隆丁未第二人及第自恃文思敏捷散館前戲與友人約曰午交卷出當讌於某所致誤引登九餘三爲登三餘九改官比部出爲充沂曹道乞病歸越六十年袁詒庵觀察

續懋

以道光丁未第二

人及第亦緣事降部曹出權延建邵道值粵匪擾閩移守順昌歿於陣觀察到閩余已罷官未相見其夫人與閨人序姊妹行出示觀察詞一叢花云秋聲萬里度長空落葉捲西風愁心重疊渾無際都付與天末征鴻菊

老楓丹。故園何處。搔首月明中。○重幃迢遞隔遼東。雙
鯉信難通。一枝修竹頻番倚。早不道。染袂霜濃。拔劍歌
哀。檢書燭短。無語聽疎鐘。曉雨和象如弟。陽關引云纔
送春光去。又灑黃梅雨。滿庭竹影。淒清甚。憑誰語。撫瑤
琴一曲。幽恨終難訴。看裊盡。博山殘篆。嬾重炷。○苗苗
煙中吐。空媚嫵。最難堪是。聽蛙鼓。喧無數。又瀟瀟。幾陣
溼。徧灣頭樹。鎮無聊。一襟清淚共酸楚。尙是在京時作
語。殊悲惻。自粵匪亂起。文臣之身。膏原野者。不知凡幾
其有詞章堪誌者。以余所知。僅得數人。觀察其一也。吳
縣曹觀察懋堅咏魚鼓摸魚兒云。捲晴漪。翠綸收罷。菱

葵鼓向沙灘。賣鮮聽得紅腔熟。一帶枕流窗戶。誰喚住。
又四面菱歌。蕩入蘆花去。銀絲趁取。記換酒歸來。隔溪
春賽。白點社公雨。○閒拋網。撥刺錦鱗無數。鳴榔爭響
何處。蘋洲幾疊。催花發。絕勝柘枝新譜。煙水趣。把酒臘
餘音。留與希真賦。舟橫野渡。有鼃唱初更。蛤喧荒岸。柳
外半蟾吐。錢塘戴學士熙題李石梧太史與其配郭笙
愉夫人梧笙唱和詩高陽臺云。闌角裁箋。簾幙鬪韻。深
閨無限清歡。留戀金門。年來韻事都刪。湘江一棹攜來。
穩喜筠奩安近蓬山。正天邊似鏡明蟾。掩映團圓。○彩
毫定得江山助。莫輕將院體。寫向烏闌。瘦比黃花。還應

壓倒詞壇。空齋茶熟香溫候。怕新聲欲和偏難。更休教。
吟到宵分耐盡春寒。吾鄉李仲騫明府蝶戀花云春到
小庭春事晚。綠暗紅稀。無計將春挽。杜宇聲聲啼更嬾。
殷勤且拾飛花瓣。○窗外月痕花霧綰。拚得無眠。整把
歸鴻盼。不信彩雲容易散。曉妝人起春山淡。商城周仙
嶠司馬減字木蘭花云靜垂銀蒜。一桁珠簾閑不捲。早
被東風吹落瑤堦芍藥紅。○蜂衙放午。金鴨香殘慵更
炷。裊盡游絲。正是鶯酣蝶困時。明府名福培甫弱冠登
道光壬午賢書春闈屢黜銓廣東從化令城陷自焚觀
察字良甫與吾鄉趙文晉潤同字少時徵逐詞場人因

趙曹音相近以仄艮平艮別之壬辰進士官御史游升
湖北糧道武昌再陷殉難學士字醇士亦壬辰進士詩
文外兼擅繪事乞病家居杭州不守遂自盡司馬名祖
銜戊戌翰林改官大治令瘦羸多能初不解倚聲偶見
余篋中花庵詞選取回讀之捉筆成前詞強余爲定數
字虛懷善下尤爲罕覩後以同知需次鄂城楚初被兵
歿於亂軍中

吳紅生觀察

葆晉

有潘紱庭侍讀得黃蓼花於內閣典

籍聽馳寄乃兄功甫舍人植之吳下賦詞索和次韻高
陽臺云翦翠莖疎綴金穗短一枝颭向涼天歸去王孫

問花可似當年。月中寫出昏黃影。更添些清露珠圓。最難傳。鳴雁雖離。遠道綿綿。○春來各有池塘夢。暗魂消。爪雪紅藥階前。聽雨心情。半庭孤影誰憐。西風一種閒花草。卻無端。染徧鱸煙。覓歸船。載得芳叢。穩抱鷗眠。原註

余家固始之古蓼。伯兄亦官中書。觀察道光己丑進士官淮海道。曾權

江蘇臬使。後亦殞粵匪難。

陽湖湯貞愍

貽汾

爲鳳山令

大奎

孫鳳山公與子

苟業

同殞林爽文之難。公由世襲雲騎尉。歷官樂清副將。乞病歸。卜居金陵。咸豐三年城破。賦絕命詞於二月十二日。投水死。蒙

恩賜謚公字雨生善詩詞能畫兼工琴晚自號琴隱
固彬彬儒將也有題其夫人梅窗琴趣圖七娘子云泠泠
瘦玉纖纖指深深繡幙悠悠思畫了眉山燒殘心字百
花頭上春先至○江南本是藏春地高樓早築香雲裏
冰雪聰明漆膠情意祇應慚愧梅花堦衰柳長亭怨慢
云更誰向灞橋攀折萬里關河一天風雪古陌人稀幾
絲猶向馬頭拂蕭蕭短鬢正顧影同懷絕盼斷七香車
還只當聽鶯時節○休說賺高樓翠袖望眼欲穿天末
浮萍散了怕流水也應消歇最苦是落葉江城賸一笛
風前幽咽算夢裏腰肢難解眉頭千結武臣能詩者多

能詞者少得之於公尤爲可寶公歿後海內文人咸賦

詩詞志輓華亭王海客

友光

金縷曲云臣本心如水。僊

聲聲秦淮悽咽。陣雲同陸。虎踞龍蟠形勝在。借箸偏教
吐棄。儘灞上。棘門兒戲。霎地江東成破竹。道乘軒有鶴
南飛矣。公等且自爲計。○水仙廿載傳琴意。問春風臺
城新柳。舊愁添幾。正是百花生日日。卻看從容就義。想
叱咤雲濤歸騎。高克翱翔難索解。料三吳。毅魄能陰庇。
疑復有。養癰悔。以詞筆而兼記事有鶴南飛句係指陸
立夫制軍

建瀛

言制軍守九江聞武昌陷盡撤沿江戍

兵一夕遁回金陵遂不守河上翱翔句似謂何根雲制

軍桂清

後亦棄常州遁致大江以南蹂躪無完土至今

士庶言之有餘痛焉

貞愍配董雙湖夫人

琬貞

同郡東亭太史

湖

女孫嫺雅

通文先公卒自題梅窗琴趣圖青玉案云梅花不作瑤
琴主更絕塞霜笳苦畫裏韶光如夢度朱闌池漲綠窗
花雨舊是藏春處○如今並命天應妒無限春消碧煙
縷祇恐人梅同老暮蘆簾紙閣思量歸去試聽水絃語
詞殆作於公官靈邱都閫時故有絕塞霜笳語

嘉慶間儒將世推二湯謂雨生副將與漁村總兵也咸
官江浙愛與文士游疆吏亦異目視之漁村名攀龍本

丹徒諸生厯官黃巖總兵人傳其唐多令云秋柳盡闌
荒秋簾鏡檻涼不多時憔悴秋娘惱亂西風偏作劇催
燕子去雕梁○往事幾回腸歡場卽夢場再藏嬌誰與
平章小疊蠻箋憑慰藉知減盡舊時妝絕不似長槍大
戟人語憶三十年前武臣無所事卽不善詩文亦思以
書畫自見近十餘年文臣且競以武功顯矣

吳門張君

玉瑞

戲咏不倒翁踏莎行云捷足休矜低頭

未肯此翁崛起真天性空空如縱任嘲嗤亭亭然自堪
欽敬○徙轉何常推排莫定慣經顛撲曾無愠想因嚼
蠟悟橫陳卻愁強項難爲令詞雖淺俚然讀至末句不

覺憬然昔余杖大吏輿人爲所銜卒以文官領兵不合
例劾余實緣余素不知兵投筆棄繻本非始願惟念令
公家兒其度量真不可及耳

袁丈湘湄

棠

家藏宋周益公洮瓊研因以名館並所著

詞咏柳沁園春云辛苦東風約綠回黃搓絲染條念腰
身楚楚瘦圍禁捻眉痕淺淺好樣偷描羌笛一聲陽關
三疊裙帶同心綰不牢慵開眼看車迴馬去亭子勞勞
○河橋回首迢迢更何待秋來魂暗銷只天涯孤夢春
隨絮遠門前流水人逐萍飄難忘滿裙那時解珮一線
青拖小翠翹重經過恐折殘枝長還比樓高眼兒媚云

小名錄就怕重看。見月想姿圓。賣錫門巷。湔裙伴侶。撲蝶闌干。○至今合眼分明在。彈淚涇流年。梨雲夢淺。桃花命薄。梅子心酸。皆爲侍姬三多作。姬姓柳家金陵故。夫人媵婢及笄。遣歸丈不能忘懷。後赴白門。遇姬猶未嫁。喜甚。集中新水和愁。連夜漲。晚花含蕊。待春深句。亦爲姬賦。並賦浪淘沙云。迷路得花看。暫解雕鞍。縑絲門巷雨漫漫。借問小姑團扇上。可盡乘鸞。○山果配蔬盤。菰脆梅酸。隔窗燈影夜闌干。閑煞半牀青綺被。各自宵寒。遂以雙槩載歸。夫人亦無如何。未幾有袁江之行。又賦少年游云。青溪曾繫木蘭舟。人在水邊樓。鶯柳簷牙。

鴨桃闌角。雙影瀉春流。○載伊歸去。儂偏出。此別甚因。
由。客館鶯花。堦鄉風月。渾不似前游。丈吳江。人居蘇城。
工詩善繪事。詞名震一時。同郭頻伽題春人綰髻圖。夜
行船。云滿院。熏人花氣。愁未醒。恁懨懨地。臨妝略略手。
盤鴉。飄一縷。墮雲慵理。○記得秋娘十三四。學梳頭。水
晶簾底。如何已是。沒心情。便愛綰。不聊生髻。次子寔字
山史。能繼家學。有餅桃花館詞清平樂。云霜寒月苦。秋
夜長如許。夢醒無聊更暗數。殘點正敲第五。○蕭蕭庭
外風聲。沉沉遠寺鐘鳴。最是燈花如豆。照人孤影。偏明。
偷聲木蘭花。云微雲四卷。天河靜。寂寞空庭涼。月影挂。

起簾鉤。一葉梧桐恰報秋。○蟲聲唧唧牆陰起。最是離人偏入耳。休凭闌干。今夜風寒露更寒。惜早天。僅一十二丈哭之慟不久亦卒。

寶山蔣劍人所著芬陀利室詞中一題云宋楊恢游潯溪作碧崖倒影一首末句漠漠水天遠五字詞甚佳惜調名不著各家詞選萬氏詞律俱不載滄海遺珠可勝歎惋辛亥冬泛舟柳湖凍雲下垂滄波不流絮帽篷窗四望寥廓爰填是解卽用其韻援魚游春水例名之曰水天遠余細繹音調頗似二郎神惟後結少一字語溪集錄其詞云碧涯倒影。浸一片寒江如練。正岸岸梅花。

村村修竹。喚醒春風筆硯。沂水舟輕輕如葉。只消得、溪
風一箭。看水部雄文。太師健筆。月寒波卷。○游倦。片雲
孤鶴。江湖都徧。慨金屋藏妖。繡屏包禍。欲與三郎痛辨。
回首前朝。斷魂殘照。幾度山花崖蘚。無限意。都付空尊。
漠漠水天遠。無限下原脫意字恐係水遙天。遠落去一字。釁人

未經細考。謂爲調名不著。以水天遠名之所作詞。又於
後段次句多一字。未免自誤。誤人考宋湯恢字西村詞。
綜錄詞五闕。惟新刊絕妙好詞作楊恢。箋爲眉山。人尙
有八聲甘州云。摘青梅薦酒。甚殘寒。猶怯。苧蘿衣。正柳
腴花瘦。綠雲冉冉。紅雪霏霏。隔屋秦箏。依約。誰品。冶春

詞。回首繁華夢。流水斜暉。○寄隱孤山山下。但一瓢飲
水深。掩苔扉。羨青山有思。白鶴早忘機。悵年華。不禁搔
首。又天涯。彈淚送春歸。銷魂遠。千山啼鴂。十里荼蘼。原本
脫治字 玩詞意殆南宋遺民放浪泉石間者楊恢之名
早字 僅見略陽石刻敘別記籍係寶城非眉山

蔡步仙女史

提

爲閩縣林西仲大令

雲銘

室大令集中

附女史詞數闋。紀仁和沈孝女刲肱殞命。滿江紅云有
限春暉。卻不道。陰晴莫測。更聽得。巫醫耳語。參苓力竭。
擗地誓將遺體代。呼天暗把鑪香爇。掣金刀。良藥腕閒
尋他何恤。○冀挽住。西山日。早流盡。襟前血。奈絲堪重

續玉偏易折。五夜驚回雙豎夢。一絲喘斷三更月。謝去
君莫怨暫歸甯。成長別。惜未載其父與夫家名姓竊按
刲肝割臂例無給獎專條然有奏

聞無不俞允猶之婦女夫亡自殉乾隆中欽奉

諭旨婦能守節已佳何必殉此後輕身一死者不必旌

嗣有題請仍旌之同一天地父母之心近來以孝女請

褒者比比而是回憶先太夫人病時儀方奉檄襄陽

幼妹小娟潛刲臂肉以進先太夫人獲延數月儀得

請急歸親視含殮今妹壻胡謙齋益源已官通判故不

敢援案上陳孤露餘生疚心曷旣

耿精忠叛時聞林西仲名脅之不屈幽摯之西仲女瑛
佩年甫笄見羅者曰伺於門慨然曰是蓋利吾有耳盡
出所蓄并簪珥給之家乃無恙精忠反正西仲始得脫
瑛佩工詩詞後歸閩縣諸生鄭郊有浣溪紗云檻外槐
陰護碧紗半簾風裊篆煙斜夢回無語數歸鴉○綠水
新荷搖蝶影朱闌殘照映榴花他鄉客思總無涯清平
樂云青苔庭院梁畔呢喃燕飛向風前新試翦蹴落楊
花幾片○無情春色偷歸等閑斷送芳菲獨有夜闌明
月影來扶上花枝因憶國初尙有二奇女一爲歙縣畢
韜文年二十隨父宦薊邛父與流賊戰死韜文身率精

銳夜刼賊營手刃其渠輿父屍歸葬後適布衣王聖開
夫婦偕隱有村居詩云席門閑傍水之涯夫壻安貧不
作家明日斷炊何暇問且攜鴉嘴種梅花一爲蕭山沈
雲英父至緒崇禎中官道州守備戰歿雲英偵知賊勝
而驕卽率健兒突賊壘斬寇奪骸而歸賊憚之他適州
城以全事聞卽授雲英游擊將軍代父守道州會其夫
賈萬策以都司守荊州城陷遇害遂乞歸貧甚爲女學
究以終三女識行鬚眉有所不如故連綴書之雲英事
毛西河集誌之甚詳

自蘇城至虎邱中爲山塘月地花天終歲遊人如織烏

絲詞所謂夜火千家紅杏幕春衫十里綠楊樓是也逮
金陵陷後虎旅雲屯漸形寥落祥符周季貺司馬

星詒

有重過山塘感賦減字木蘭花云山光水色風景依稀
渾似昔少了燈船閑煞山塘七里煙○屋荒人靜歌板
酒旗零落盡月黑風尖小隊銀刀結束嚴誦之令人悵
惘乃未幾復爲豺虎所窟今狼氛雖淨正未知何日能
還舊觀耳司馬工詩詞饒幹才官邵武府丞賊踪近提
師出禦獨當其衝與乃兄叔雲給諫合刊詞一帙給諫
名星譽庚戌翰林所著東鷗草堂詞尤精警春日卽事
踏莎行云珠幕閑垂銀屏慵展櫻桃斗帳金鳬暖綠楊

池館閉春陰。卷簾人比東風嬾。○眉葉青銷。壓花紅斂。
纖腰打疊。游絲軟。恹恹病過海棠時。一春都被春愁管。
秋夜對月有憶。寄友翠樓吟云。鎖了重門。碧梧疎處。湘
簾夜深猶捲。露鴉棲定後。只秋與竹聲撩亂。單衫小扇。
想花影吹笙。那家庭院。無人伴。冷清清地。回廊兜轉。○
腸斷。滿地蕉陰。靠紅闌幾摺。和誰同看。蘇家潭上路。正
小曲。幽坊月暗。桂堂南畔。問剗襪香堦。甚時重見。無眠
慣。燈窗數盡。銀河新雁。七月初十夜。雨有憶秋千索云。
桃笙簟滑。啼痕溼。金井外。幾聲秋蟬。雨緊燈花墮。瘦紅
記今夜。剛初十。○猩屏錦褥都非昔。況又是。影雙人隻。

一院蕉陰似那時。少了箇朦朧月。又有洞仙歌云。呵鈿
綰翠。坐棗花簾底。華銳斜簪小鴉髻。想妝成力怯。換了
鸞衫。停半晌。纔見盈盈扶起。○問名佯不說。淺笑低聲。
暗裏牽衣要人替。似喜似含顰。道是矜嚴。卻偏又恁慙
慙地也。忒煞難猜箇人心。笑事事朦朧者般年紀。描寫
可稱曲盡。若僅作豔詞讀。非知詞者。

司馬詞名。勉憲題繼叔重司馬小紅樓閣填詞圖。蝶戀
花云。綠綳羅窗清似水。閣外梧桐。搖得秋痕碎。幾折闌
干人獨倚。篆煙碧漾簾波膩。○多少無聊無賴意。譜入
鷓鴣絃。半是相思淚。煙水斜陽紅萬里。閑情少箇涼鷗寄。

冬夜宿杭州林氏友梅堂寄陳季存家叔子淒涼犯云
凍雲如墨沈沈甚晚風吹送天黑坐來偏嬾眠來又怯
布衾如鐵誰家橫笛更悵悵做成淒切怎支持亂鴉聲
裏枯柳蕩寒色○遙想聯吟際窗孕燈紅簾涵煙碧詩
成一笑恰黃梅繁開似雪應也懷人正載酒江湖獨客
又窗前陣陣急雨打破葉泊三板橋感舊朝中措云盡
船明月客衣單日暮悄生寒白板垂楊門巷紅樓臨水
闌干○而今寂寞雨疎煙淡燕老鶯殘正是熟梅時節
那堪重客江南按古來兄弟能詞者山谷有兄元明少
游有弟少章王和甫平甫孔常父毅父曾子固子開洪

文惠文敏及廬陵李氏花萼集均不過單詞或數闕而已至坡公弟子由所傳漁家傲一詞卽不甚工本朝王阮亭尙書與兄西樵陳其年太史與弟緯雲均以詞名然炊聞紅鹽二集遠不如衍波烏絲今給諫昆仲填吹簾應殆將上揜古人

世有名重一時而究其實頗不相酬者豈立德立言亦

如立功者流繫命運不繫才學耶會稽潘少白

語

以布

衣游公卿間足跡幾徧天下江甯朱幹臣中丞

桂楨

尊

之如師顧所著常語及詩文集多襲前人牙慧至詩中歲事春復秋人事朝復暮詩成天上白玉闕酒醒人間

黃鶴樓等句幾墮惡道惟小詞數闕如醉太平云空堦
月明風聲葉聲小庭寂寂門扃知殘宵幾更○孤吟自
聽孤觴自傾醉來倒觸風屣竟無人喚醒相見歡云淒
淒暮雨園亭峭寒生流水落花春去太無情○終日醉
終宵睡有時醒一點一更簷滴怎生聽滿宮花云晚晴
天風又起紅滿綠溪春水小童沽酒不曾歸減卻半園
桃李○少年狂今倦矣剩有惜花情意年年寒食鎮無
聊愁醒又還愁醉頗清脆可誦

詩文而加圈點自是陋習然詞句長短不齊不加識別
易滋訛錯宜與蔣京少

景祁

所輯瑤華詞僅圈句讀最

得體要若讀用尖點句用圓點韻用空圈似更明晰至
雙調分段處亦宜照宋槧花間集式中閒以圈爲是京
少少與宋牧仲尙書友以樂府相切劘雖所選珉珉糅
雜而明末國初詞人姓氏實賴以存乃王氏詞綜多
未錄如宛平李長文侍讀

昌垣

踏莎行云翠幙煙沉珠

簾月小枝頭未雪梅開早倚闌無計遣新愁亂鴉啼徧
歸鴻杳○霜杵敲寒風燈破曉漏聲滴盡鐘聲悄香殘
酒醒不成眠流蘇好夢天涯少漢陽許漱石部曹

承欽

蕪城懷古金人捧露盤云斷釵青燐火碧鼠姑妍向竹
西重整吟鞭香消螺黛瓊簫聲斷更誰傳玉鈎繡瓦秋

螢苑想像當年。○野蛾生凝暉殿。驚湍濺太慈磚。剩荒
原綠樹如煙。珠堂月觀。但聞老衲夜談禪。鮑家鬼唱紅
橋外。落葉哀蟬。宜興任青際。孝廉

細槐

秋夜聽琴清平

樂云涼生錦褥。滅盡梧桐綠。漫譜當年橫吹曲。試鼓商
陵黃鵠。○舊傳子夜烏啼。新翻雄雉朝飛。彈到一聲裂

帛。不禁清淚沾衣。嘉善孫古喈別駕

錄

浣溪紗云蘭比

風姿蕙比心。晝長無那嬾拈針。霓裳一曲理瑤琴。○含

蕊花宜春雨釀。初眠柳怕曉風侵。蘼蕪隨處悔教尋。華

亭單孝求明經

昭儒

漁家傲云三月天桃紅似錦。花風

吹送春歸信。又見廉纖飄陣陣。清和近。雕梁燕壘香泥

沁。○麥秀時光寒。尙嫩。袂衣初試。冰肌潤。爲底雲鬟慵
不整。重門靜。小園閑。煞秋千影。宜興吳狎鷗。白涵寒檠

剔銀燈云耐盡寒宵滋味。卻只是一龕斜背。低映鴛幃。
高擎鳳足。不是年來情思。支頤憑几。好留待。竹鑪茶沸。

○泠泠清清如此。好箇愁人天氣。欲暗還明。頻挑不焰。
似這病懨懨地。霜風又起。早逼得。光兒愈細。華亭錢武

子德震

玉樓春云白蘋洲上西風急。睡起登樓心尙怯。

落葉爭從斷岸飛。殘蟬自抱枯枝咽。○青山無恙人輕
別。一片秋聲聽不得。采菱歌散晚霞收。冷浸寒波今夜
月。臨川陳少游孝逸宋宮人墓虞美人云春風夜月年

年度道是埋香處。胭脂幸免葬龍沙。留與行人指點玉
鉤斜。○梨花寒食添淒切。滿地飛蛺蝶。羅裊一色繡春
燕。誰念六陵無樹可棲烏。宜興儲耀遠。福觀點絳脣云
啼倦寒蟬。一襟秋思憑誰道。綺窗人杳。長徧紅心草。○
不聽琵琶。已被離愁繞。西風峭。敝衣茸帽。人在天涯老。
無錫馬雲翎孝廉。狎浣溪紗云綠徧千山響。杜鵑柳枝
低亞。燕蹁躑。幾曾風雨似今年。○蓮瓣一鈎春印淺。菱
花七出曉妝妍。半垂紅袖撥沉煙。太倉黃靜御。鴻搗練
子云風點點。雨絲絲。攪亂芭蕉和竹枝。隔箇窗兒聽不
得。淒涼又是上燈時。嘉興柯蓉生。剛燦月下笛云何處

樓頭一聲寥亮。費人清淚。眞珠簾底。可是石家舊歌吹。
依稀纔度東牆遠。卻宛轉。吹殘流水。料斜橫粉靨。那人
猶在梅花香裏。○傾耳。清如此。想翠竹經霜。正欺寒袂。
關山萬里。沙邊落雁驚起。江雲凍合。淒涼月。問憶著。昭
華曾未。纔三弄。又還停。好識桓伊幽思。嘉興李西園。
葵生醉花陰。云惱亂離腸。秋草色。人比天涯隔。相約柳初
黃。望到而今。滿地堆殘碧。○斜陽鴉背。西風急。拚醉眠
無力。欲待不思量。酒醒香寒。爭不思量得。歛縣程。鬲堂
麟德蘆花摸魚兒。云記年時。圓沙淺水。芳洲一抹煙黛。
荻芽短。爆鸚哥嘴。倏爾霜凝碧海。君休怪。待送客。潯陽。

好與丹楓賽。卻愁風快。把落泊浮踪。離披殘夢。吹向楚
天外。○輕盈態。錯道雪花飄灑。漁人醉笠初解。昨來帆
櫓。淩波渡。千點浪頭同拜。江九派。又認是。細篩碧月鋪
銀界。水流雲在。笑暖被溫衣。幾回相聚。柳絮恁無奈。宜
興湯次會。思孝踏莎行云屋角風尖。房櫳曛短。寒衣補
綻。催針線。天吳紫鳳。拆憑伊。賸好鴛鴦休錯剪。○黑月
霾低。碧紗愁掩。燈添紅暈。綿裝繭。倩他排遣。過黃昏。永
夜沉沉。天不管。潘尊庵大守。眉蝶戀花云將煙做雨催
寒食。滿院花枝。開向春無力。幸有多情苔蘚碧。春泥未
浣殘紅色。○此景今年難再得。呼取狂朋。好把春光惜。

簾外海棠愁思結。不言不語胭脂溼。各家詞不一格而
俗塵腐氣屏除俱盡似不應棄同瓦礫